



Minggu, 21 Maret 2021
Ogen: Jeremia 50: 17-20



Ngenanami Perkuah Ate Tuhan



Umpamanya, lit sekalak si merawa kal atena man banta, perbahan mbelin kal kesalahenta bana. Lanai iakapna meriah ras kita, banci jadi ijagana jarak ras kita, janah iukumna pe kita. Uga me akapndu pengejapennta? Banci saja erbage perasan lit asum jadi si e. Banci kita rukur lanai ndalankenca mulihi bagi si la ngena atena, banci kita erkadiola entah pe enggo segan guna mperkuanken ia, ntah lanai bo ngena atena adi sicakapi kita. Tapi kalak si ngalemi alu tulus mbelin kap pengarapenna gelah kita robah ku dalam si mehuli, gelah ola kita bene. Kenca si e enggo lupakenna kesalahenta dengen ersura ia mulihi meriah ras kita. Adina jadi situasai si bagenda, tuhu-tuhu ngataken bujur kita man bana. Lanai kel ateta sengaja mulihi erbanca ceda ukurna.

Dibata Israel eme Dibata si konsisten. Adi merawa Ia iukumNa bangsa e. Tapi adi niNa Ia engkelengi, tuhu-tuhu sampur ka nge keleng ateNa e. I bas konteks oratenta enda, enggo seh waktuna ia engkelengi dengen mabai bangsa e mulih ku Jerusalem (ay. 19 a "Kupemulih me bangsangKu ku negerina jine"). Enggo mekuah ateNa ngenen bangsaNa e iserang Asyur, iperbudak Nebukadnesar. I bas paksa Dibata nehken keleng ateNa man Israel, ertekad bangsa e lanai ngelakoken dosa. Simehulina min, kalak si enggo ngaloken perkuah ate Dibata tetap nginget si e i bas kegeluhenna, Dibata tetap ersura gelah kalak si ngelakoken kejahatan la mate i bas dosa, Dibata berinisiatif guna nelamatkan kalak si erdosa, atena ola anak-anakNa e bene, tapi gelah dat kegeluhen dem alu kinijeraan, gelah kegeluhenna reh sikapna. Sebab Dibata nggo ngalemi dengen ncidahkan keleng ateNa si tetap. Ngidah perbahanen Dibata e lanai min arusna kita mulihken ku bas dosa. Perlu kal penanam-nanam perkuah ateNa si mbelin eme kita enggo ngaloken keterkelinen.